

58700
(26 X
אצבט אלהים הוה

Id est:

DISSERTATIO THEOLOGICA

De

MIRACULIS,

Quam

P R Æ S I D E,

Viro Magnifico, summè Reverendo atq; Amplissimo,

DN. JOH. ADAMO OSIANDRO,

SS. Theol. Doct. Professoreque Primario longè famigeratissimo, Cancellario Academia EBERHARDINÆ quàm

Dignissimo, h. t. DECANO Facult. Theol. Spectatissimo,

nec non Præposito Ecclesiæ Tubingensis Venerabilissimo;

DN. Præceptore, Patrono & Promotore æstimatissimo;

Publicè defendet

M. JOHANN-LUDOVICUS Schaubecker /

Pastor Donnstettensis, Auth. & Resp.

IN AULA THEOLOGORUM NOVA

Ad Dies & Septembr.

PSALM. 119. v. 18.

*Revela oculos meos Domine, & considerabo
mirabilia de lege tuâ.*

T U B I N G Æ,

Typis JOHANN-HENRICI REISL,

ANNO M DC LXXXII.



SERENISSIMI WÜRTEMBERGIÆ
DUCIS
SENATUI ECCLESIASTICO
PER-INCLUTO,
VIRIS

*Reverendâ Dignitate, Strenuâ Magnificentia,
Amplissimâ Autoritate, Summâ Gravitate Celeberrimis.*

DN. CHRISTOPHORO BÖLSSLIN / SS. Theol. Doct. Famigeratissimo, Collegiatæ, quæ Stuttgartiæ est, Ecclesiæ Præposito Dignissimo, Serenit. Würtemb. à Confessionibus Sacris, Consiliisque Ecclesiasticis: Theologo à meritis in Ecclesiam Celebratissimo.

DN. ANDRÆ BARDILI, U. J. D. Celeberrimo, Illustris Consistorii Vice-Directori, redituumque Ecclesiasticorum Advocato Fidelissimo.

DN. M. JOH. LAURENTIO Schmidlin / Ecclesiæ Cathedralis Stuttgartianæ Antistiti Vigilantissimo, Consistorii Ducalis Assessori Gravissimo & Cœnobiarchæ Herren-Albeni Dignissimo.

DN. M. JOH. FRIDERICO Hochstetter / Serenissimo Würtembergiæ Ducis Concionatori Aulico Primario, Consistorii pariter Assessori Meritissimo.

DN. BARTHOLOMÆO Haage / Concionatori Aulico, Consistorii itidem Assessori Spectatissimo.

Dnn. Mæcenatibus Patronis ac Promotoribus suis sanctissimè perenniter Devenerandis

Specimen hoc quaecunque

In debita Observantia testimonium,

*Suique commendationem
Dedicat*

Cliens Humil.

AUTHOR & RESP.





P R Æ F A T I O

Ad Benevolum Lectorem.

NOtanter, Benevole Domine Lector, Hieronymus in Epistolâ ad Fabiolam de Veste Sacerdotali: *Tanta, inquit, debet esse scientia, & eruditio Pontificis DEI, ut & gressus ejus, & motus, & universa vocalia sint, veritatem mente concipiat, & toto eam habitu resonet, & ornatu, ut quicquid agit, quicquid loquitur, Doctrina sit populorum; absq; tintinnabulis enim & diversis coloribus, & gemmis floribusq; virtutum nec sancta ingredi potest, nec nomen Antistitis possidere.* Indigitatur itaque officium, & debitum boni Pastoris, nempe ut eruditionem ejus doctrinamque ubique comitentur virtutes, adeoque omnia vocalia sint, dicta & facta ejus *ἑνφωνα*. Si itaque non tantum homiletica, sed & polemica sunt doctrina populorum; subsumo ego, & hoc *ἑνφωνον* esse, si Minister Ecclesiæ homileticis addit polemica, & pro nunc & tunc in Collegiis Disputatoriis tintinnabula sua aliquantum resonare facit; Christus enim ipse in juvenili jam ætate *συζητήσας* interfuit Theologicæ, variasque ventilavit. Quapropter & ego ausus sum, quanquam fluctuans diu, prorepere, actumque Disputatorium sustinere, unicum exorans, ut conatum meum haud sinistrè interpreteris; nulla enim penes me ambitio. Deus, cui soli perspectæ sunt viæ meæ, faxit, ut omnia cedant in Gloriam Nominis sui! quo cum sisto

SECTIONEM I.

QUæ præsentat Originationem, Synonymiam, & Homonymiam miraculorum. Vox autem Miraculi composita videtur à Miro, & antiquo cello, vel κέλλω i. e. moveo, impello, quia miracula tanquam insolitum quid animum quasi movent, & percellunt. Synonyma sunt signa, prodigia, Græcis θαύματα, σημεῖα, τέρατα dicta, ut & δυνάμεις Joh. 4. ὕψ. 48. Ἀκτορ. 2. ὕψ. 22. Sumuntur verò Miracula duplici sensu, lato, & stricto; illò Miraculum dicitur omne id, quod vel non est secundum naturam, sed præter, ut monstrum, teste Varrone lib. 6. de caus. L. L. vel quod nostro intellectui insolitum, atque ex ignorantia causarum supra naturam esse æstimatur, unde Thomas l. 3. contra gentes cap. 97. *Admiramur aliquid, cum effectum videntes ignoramus causam, vel rationem modi in agendo non assequimur*: hoc, quando quid omnes naturæ vires transcendit, revera est, & fit supra & contra naturam, adeòque solius DEI opus, de quo

SECTIO II.

QUæ monstrat existentiam, divisionem, & definitionem Miraculorum. Existentiam quod concernit, inconfesso est, data esse, & eventura olim miracula. De futuritione ipse Christus μάρτυς ἀληθής: ἐγερθήσονται ψευδόχριστοι, καὶ ψευδοπροφῆται, καὶ δώσουσι σημεῖα μεγάλα, καὶ τέρατα ὥστε πλανῆσαι εἰ δυνατόν, καὶ τοὺς ἐκλεκτούς Matth. 24. ὕψ. 24. Paulus verò de Anti-Christo: ἔστιν ἡ παρεσία κατ' ἐνέργειαν τοῦ σατανᾶ ἐν πάσῃ δυνάμει, καὶ σημείοις καὶ τέρασι ψεύδους. 2. Thess. 2. ὕψ. 9. Et ne quis regerat, allegata loca de mendacibus loqui miraculis, constat, & revera olim eventura, nempe imminente novissimo die, erunt enim signa in Sole & Lunâ, teste Christo Luc. 21. ὕψ. 25. De præstitis verò olimque exhibitis Miraculis conclamant, tam gesta Mosis, Josuæ, Eliæ, Elisæi aliorumque, qui tempore ἐπαγγελίας vixerunt, quàm Christi, qui propter abundantiam miraculorum vocatus ἀνὴρ τοῦ θεοῦ δυνάμει καὶ τέρασι καὶ σημείοις. Ἀκτορ. 2. ὕψ. 22. & Apostolorum, qui induti erant virtute ex alto Luc. 24. ὕψ. 49. Quòd autem

antem pro nunc, & hocipsô tempore dentur strictè dicta miracula, valdè dubito, cùm sonus Apostolorum jam olim in omnem terram exierit Rom. 10. vñ. 18. verbumq; veritatis jam tempore Pauli in universo mundo fructificârit Coloss. 1. vñ. 6. confirmatum comitantibus signis. Marc. 16. vñ. 20. de quo plura in sequentibus. Ad Divisionem verò ut progrediamur, communiter dividuntur miracula in *vera*, & *falsa*, vel *mendacia*. Hæc sunt, quæ vel à Diabolo, vel asseclis ejus quocunque modo, vel præstigiis, vel perturbatione sensuum, vel corruptione eorum, vel mutatione aut remotione Objecti, fiunt, non ut prosint, sed ut noceant, hominiquè imponant, & à Deo abstrahant, & falsa sunt tam ratione formæ, quàm finis: illa paulò infrà definientur. Notandum verò tritam potius, quàm accuratam esse hanc Divisionem: si enim miracula strictè definiuntur actiones unius, & solius DEI; indigna sunt miracula *ψεύδης*, ut tanquam Dagon Arcæ fœderis, veris putà miraculis affociantur, nec penes hæc subsistere possunt. Accuratiùs dividuntur miracula in *privativa*, & *positiva*. Illa sunt, cùm rei actiones naturales ad tempus inhibentur, non interventu causarum physicarum, sed peculiari virtute DEI, causæ summæ, & universalis, prout sol stetit. Jos. 10. vñ. 13. retrocessit Esa. 38. vñ. 8. & ferrum natavit, 2. Reg. 6. vñ. 6. Hæc verò, cùm res novis qualitatibus donantur, ut quando *steriles pariunt*, Psal. 113. vñ. 9. morbi præter naturæ cursum sanantur. Accuratiùs quoque Biel 2. sent. dist. 8. quæst. 2. *Potest dupliciter fieri miraculum*, quantum ad rem factam, & quantum ad modum faciendi: quantum ad rem factam, quando effectus producitur non concurrente causâ secundâ naturali, aut in subiecto non habente ordinem naturalem ad susceptionem talis effectus, quantum ad modum faciendi, cùm aliquid producitur à causis naturalibus sed in morâ breviori, quàm sit solitus naturæ cursus. Accuratiùs porrò Thomas p. 3. qu. 29. art. 1. resp. ad 2. qui distinguit miracula in ea, quæ sunt ad fidei confirmationem, & ea, de quibus ipsis est fides, quale est miraculum partûs virginæ. Plures vide distinctiones in Gerhar. loc. de Eccl. Imminet autem definitio; latè verò alii, alii concisè nimis progrediuntur, Augustinus miraculum vocat, quicquid arduum, aut insolitum supra spem vel facultatem mirantis apparet. Alphonso

phonso de Castro *miraculum est res insolita supra naturæ potentiam operata.* Tenuitati meæ *miracula sunt Actiones unius & solius DEI, contra & supra naturam profectæ, quæ vel immediatè ab ipso DEO, vel mediatè ab hominibus, servis DEI, pro arbitrio divino in hominibus, cœlestibus, elementaribus mineralibus aliisque sublunaribus exercentur, tam ad manifestandam gloriam DEI, quàm roborandam dictorum veritatem, ut ex iis homines vel fidem concipiant, vel in eadem confirmentur.* Undè emergit

S E C T I O III.

Sistens causam Principalem Efficientem Miraculorum, quæ est solus DEUS, Effentia unus, & Personis trinus, manu-ducente (1.) S. Scripturâ, ita enim psaltes Psal. 136. *vs. 4. Confitemini Domino, qui facit mirabilia magna solus; quibus consentit versus 14. Psalmi 77. taliter sonans: DEUS in sancto via tua, quis DEUS Magnus sicut DEUS noster, tu es DEUS qui facis mirabilia.* Undè tale fuit Argumentum. Cuicunque miracula in S. Scripturâ contradiſtinctè ad quamvis creaturam tribuuntur, ille eorum unicus, & solus Auctor sit oportet. Atqui DEO Triuni ita tribuuntur, Ergo. Major suâ luce radiat; Minor verò probatur in allegatis locis: ei enim miracula tribuuntur Psal. 136. *vs. 4. qui fecit cœlos, expandit terram: atqui hic solus est DEUS Esa. 45. vs. 12. primus & Novissimus Esa. 48. vs. 13. Similiter quando notanter quæritur Ps. 77. vs. 14. quis DEUS Magnus? exclusivè respondetur: tu es DEUS qui facis mirabilia, DEUS enim exclusivè redemit in brachio suo populum suum. vs. 16. Dices: eatenus unicè adscribi miracula DEO, quatenus liberavit populum suum, creavit cœlos; cœterum non repugnare miracula creaturis, miraculis enim claruisse Moſen, Joſuam, Prophetas, & Apostolos. Sed falsò; quod enim valet in re pari, valet in compari; si liberatio populi judaici, si formatio cœli nomine miraculi venditatur, & solius DEI opus est, de Effentiâ Miraculorum sit oportet, omnem finitæ virtutis sphæram transcendere. Quod autem Prophetæ, aliique viri *ἱερόπνευστοι* miracula fecisse dicuntur, non *Magisteriali & propriâ*, sed *Ministeriali virtute* ea facta esse constat Exod. 8. *vs. 19.* ubi ipsi Ma-*

gi Ægyptiaci acquievêre, dicentes: Das ist Gottes Finger. (2.) Convincente naturâ, & formalitate Miraculorum; sunt enim talia opera, quæ omnem finitam virtutem excedunt, & creationis species sunt; hinc secundum Argumentum: Quæcunque opera omnem finitam δύναμιν & ἐξουσίαν exsuperant, subque titulo creationis dextrè venditantur, ea soli DEO adscribenda sunt; Atqui miracula talia sunt. Ergò. Major iterum patet, quod enim creaturis impossibile, illud DEUS facit; dum fit, quia non datur tertium inter DEUM infinitum, & creaturam finitam. Minor verò probatur inductione omnium miraculorum; *inhibitio enim solis, mutatio aquæ in vinum, restitutio sanitatis extemporanea, resuscitatio mortuorum* omnem finitam virtutem superavit ut notanter Petrus: Ἄνδρες Ἰσραηλῖται, τί θαυμάζετε ὅτι τὸ ἐγώ, ἢ ἡμῖν τί ἀπενίζετε, ὡς ἰδίᾳ δυνάμει εἰ ἐυσεβείᾳ πεποιηθῶσι & παρῆπατεῖν αὐτὸν; Act. 3. vs. 12. & porro vs. 16. ὁ θεὸς ἐσερέωσεν τὸ ὄνομα αὐτοῦ, καὶ ἡ πίστις ἡ δὲ αὐτοῦ ἔδωκεν αὐτοῖς τὴν ὁλοκληρίαν ταύτην ἀπέναντι πάντων ὑμῶν. Notanter quoque Rex ille: Numquid DEUS ego sum, ut occidere possim & vivificare. 2. Reg. 5. vs. 7. Appositè pariter Harioli illi Dan. 2. vs. 11. Sermo quem tu quæris Rex, gravis est, nec reperietur quisquam, qui indicet illum in conspectu Regis, exceptis his, quorum non est conversatio cum hominibus. Præterea, quod miracula sint species creationis patet indè, quia in miraculo fit, quod antea non fuit, quod DEI opus est, ὅς καλεῖ τὰ μὴ ὄντα ὡς ὄντα, Rom. 4. vs. 17. quique solus creaturarum substantiam, proprietates, motum & usum mutare potest aut abolere. Dices: Etiam Eliam ignem cœlò demisisse, Apostolos impuros spiritus expulisse, morbos sanasse. Sed recurrit prior responsio, quicquid enim egerunt instinctu & impulsu Spiritûs Sancti egerunt, prout & Samson Jud. 14. vs. 6. Hinc notanter Paulus: Πάντα ταῦτα ἐνεργεῖ τὸ ἐν καὶ τὸ αὐτὸ πνεῦμα. 1. Corinth. 12. vs. 11. (3.) Contestante officiò Miraculorum, sunt enim divinitatis character, & à Filio DEI ideò patrata, ut per ea demonstraret gloriam suam Joh. 2. vs. 11. & 10. vs. 25. undè tertium Argumentum. Quæcunque operationes sunt infallibile divinitatis indicium, & ideò edita à Christo,

ut manifestaret gloriam suam, ostenderetque, se esse Filium DEI, illa non creaturis, sed soli DEO adscribenda sunt. Atqui miracula tales sunt operationes, Ergò. Major est manifesta, dum enim aliquid est indicium, & character, alii tribui nequit, quia implicat indicium esse, & distinctivum quid, & tamen communicabile alteri. Minor ex allegatis locis patet, undè ipse Nicodemus: *Nemo potest hæc signa facere, quæ tu facis, nisi is, cum quo est DEUS*, Joh. 3. v. 2. quid hîc excipi possit, haud video. Instat ergò

Q U Æ S T I O.

Quid de Diaboli Operibus stupendis sit judicandum?

Magna cum & mirabilia patrare experientia monstrat, est enim Sathanas *ἰαχὺς* Luc. 11. v. 21. & si *bestia illa ignem cælo deturbavit*, teste Johanne Apoc. 13. v. 13. dependenter à Dracone, nempe Diabolo, non minoris ipse virtutis erit, & potentiæ; interim proprium & genuinum miraculorum titulum haud mereri etiam sublimia ejus opera, captumque nostrum excedentia, patet inde, quia *DEUS solus mirabilia facit* Psalm. 136. v. 4. nec parem agnoscit, Davide teste Psal. 40. v. 6. Diaboli ergò opera, quando stupenda & mirabilia sunt, *apparenter tantum*, κατὰ δόξαν talia sunt, non κατ' αἰδήθειαν; agit enim Diabolus *vel per motum localem*, quando rem aliquam oculis subtrahit, & præproperè aliam substituit, ut verè putemus, prius in posterius mutatum fuisse, quales credendæ gentiliū metamorphoses, Diomedis sociorum in aves, & Iphigeniæ in Cervam; *vel per alterationem activam passivis applicando*. Diabolus enim naturalium rerum substantias & proprietates perspetas habet, commodaque novit tempora applicandi, undè efficiuntur multa, quæ solius naturæ operatio nunquam fecisset, nisi Diabolus eam artificiosâ applicatione juvisset; prout coquus, cum suave edulium concinnat, mediante arte per ignem id excoquit, licet ignis naturaliter operetur, quod solus ignis, nisi tali arte esset

esset applicatus, nunquam effecisset. *Vel per delusionem, & deceptionem*, quæ fit tripliciter.

Primò ex parte Objecti, quando Diabolus primò ostensarum rerum celerè agitatione, subitâ occultatione, variâ collocatione, separatione, vel conglutinatione latente hominibus imponit, prout faciunt circulatores & agyrtæ varijs ligaminibus, & globulis. *Secundò* per artem perspectivæ, certâ quadam dispositione Objecti in ordine ad oculum videntis, v. gr. cum lineæ confuso ducto ordine aspicienti per foramen, vel rotata tabula speciem exhibent artificiosæ alius picturæ; sic volunt Doctores gravissimi, juncos, & paleas humi stratas, si lucernâ de cerâ, & coriô serpentis sulphuratô accensa inferatur, videri serpentes saltantes. *Tertiò* cum format subitò Objectum ex aëre, & illud offert spectatoribus, v. gr. quando vel ipse assumit, vel alteri rei circum ponit corpus aëreum, sive phantasticum, simile rei putativæ. *Quartò*, cum apponit corpus aliquod mixtum, putâ minerale, quod vi suâ naturali in causâ est, ut corpus, cui apponitur, longè aliud appareat.

Secundò fit deceptio ex parte aëris medii, *primò* quando Satan impedit, ne species ad oculum, vel alium sensum deferantur, v. gr. quando visui totum Objectum, quod coràm est, occultat, vel aliquam ejus partem. *Secundò*, si medium imbuat aliquâ qualitate, quâ species, per medium transeuntes, sic modificantur, ut Objectum non quale est, repræsentent, v. gr. *si de semine asinino & cerâ fieret candela: quæ sola in convivio luceret, omnes convivæ viderentur onoccephali.* *Tertiò*, si medium circa ipsum Objectum inspissat, undè Objecti aspectus mutatur, ut quando Denarius in scutellam aquæ plenam injectus, videtur major, & jacens in fundo apparet in superficie. *Quartò*, si motô aëris mediô simul species moventur, undè fit, ut navigantibus videantur ad navigii motum arbores moveri. *Quintò*, nonnunquam contingit falli sensus ex variâ conformatione vel multiplicatione specierum sensilium, quod contingit aliquando ex forma instrumenti, per quod videmus v. gr. quando unicum conspiciamus plures nobis unius Objecti figuras exhibet, aliquando ex instrumentorum collatione & situ, ut si plura specula diversis locis disponentur, poterunt tot de loco in locum species multiplicari, ut

B

quæ

quæ in uno loco fiunt, in alio appareant, & intuitiva rei præsentis esse visio videatur, aliquando potest contingere per solum specierum sensilium, quæ sunt in phantasiâ, transitum usque ad sensum exteriorem, vel saltem sensum communem, qui sensus eodem modo à speciebus afficiuntur, quò affecti forent, si revera ab Objectis externis eò species mitterentur; quò referunt quidam relatam à Divo Augustino apparitionem Philosophi, dubia solventis.

Tertiò ex parte Organi, quando primò Satan mutato situ Organi facit rem, quæ uno in loco est, videri esse in alio, vel geminam, quæ unica est. Secundò, si humores agitentur vel perturbentur, res aliter ac sunt conspiciuntur, ut contingit furiosis ac ebriis, quomodo Zedechias judæus opinione hominem in aëra jactabat & in membra discerpebat, recollecta verò redunabat. Tertiò, si impedit Diabolus sensationem humore aliquo crassiore, obstruens viam, ne spiritus ad organum perveniant, vel aliâ ratione vim sentiendi hebetans. Quâ forte ratione Angeli Sodomæos ἀσθενείᾳ percusserunt, ut pluribus in Comment. in Exod. Dn. D. Oslander, Cancellarius Universitatis Tub. Famigeratissimus, Hobabus noster perspicacissimus, cujus ductum hactenus sum secutus. Sequitur ergò

S E C T I O IV.

QUæ refert causam Ministerialem, vel instrumentalem. Christus enim, qui immediatè & propriâ virtute miracula fecit, Apostolis quoque ἐξουσίαν dedit pellendi morbos, sanandi egrotos Matth. 10. vs. 1. prout quoque Deus olim Moſen & Aaronem, Eliam & Elifæum aliosque Thaumaturgicâ virtute induit. Ubi NB. primò, non quibusvis, & quovis tempore servis sanctisque DEI hominibus datam fuisse virtutem miracula edendi. Eleasar enim nullis claruit miraculis, similiter Johannes Baptista, nec Jeremias, Amos aliique talia fecisse leguntur: & tam libertas Divina, quàm incredulitas hominum sæpè viam miraculis ocluserunt Marc. 9. vs. 19. Secundò, viros ἰσχυροὺς, alios plura, alios pauciora edidisse miracula. Moſes enim comparem haud habuit, Deuter. 34. vs. 10. Eliam Elifæus superavit duplicem nactus Spiritum. 2. Reg. 2. vs. 10. 15. undè

Quæ-

Q U Æ S T I O. I.

*An immediatam vocationem necessario
comitari debeant Miracula?*

Bellarminus affirmat, sed nos contradicimus ei, quia obstat.
primò, chorus Prophetarum, qui immediatè vocati erant,
 nec tamen signis conspicui; Jeremias enim, Ezechiel, Amos, Ho-
 seas, Joël aliique quæ fecerunt Miracula? nulla demonstrabis.
 Dices cum Forero, non omnia esse Scripta, quæ sunt gesta, nec
 mirum inde, si etiam Prophetarum opera non omnia fuerint literis
 consignata, maxime cum nonnulli V. T. libri injuriâ temporum
 interciderint. Sed haud solidè, quæ enim consequentia: Non o-
 mnia sunt scripta. Ergò Miracula ab allegatis Prophetis sunt e-
 dita? Item: nonnulli libri olim interierunt. Ergò Miracula Pro-
 phetarum iis scripta fuerunt? Johannem Baptistam ut præteream,
 extra dubium ille immediatè vocatus erat, signa tamen haud fecit.
 Regeres cum eodem Forero, Johannem miraculosè natum, sin-
 gularem & arctissimam vivendi rationem tenuisse, cælos apertos
 fuisse in administratione baptismi, imò ipsum Christum de legiti-
 mâ vocatione ejus testimonium perhibuisse. Sed absurdè, nani-
 1. non quæritur, quæ miracula circa ipsum Johannem facta sint,
 sed quæ ipse fecerit; *secundò* nîl minùs allegata Miracula probant,
 quàm immediatam vocationem, quia incognita erant, prout Jo-
 hannes ipse, quare tam rigorosum sustinuit examen Joh. 1. v. 21.
 Sigillatim autem nîl probat, *primò* miraculosa ejus nativitas, quia
 & Isaac ex sterili natus est matre Gen. 21. v. 6. similiter Samson.
 2. Nîl singularis & sancta ejus vivendi ratio, quia & Pseudo-
 Apostoli talem imitantur vitam Col. 2. v. 23. Nîl 3. Jeoφανία il-
 la, quia ea ad Christum declarandum contigit. Tandem *quartò*
 nîl testimonium Christi, quia subsequutum demum est functionem
 Johannis, non antegressum.

Secundò obstat Bellarminianæ Opinioni miraculorum im-
 becillitas, quia miracula non certam & infallibilem fidem ad-
 struunt immediatæ Vocationi; sequeretur enim Pseudo-Prophe-
 tas immediatè vocatos esse, quia ejusmodi signa & portenta præ-

dicere possunt, quæ eveniunt, teste Mose, qui talia: *Si surrexerit in medio tui propheta, & prædixerit signum atque portentum, & evenit, quod locutus est, & dixerit tibi: eamus & sequamur DEOS alienos; non audies verba Prophetae illius, quia tentat Dominus DEUS vester, ut palam fiat, utrum diligatis eum, nec ne?* Deuteron. 13. v. 1. Instabis porro cum Forero: Cur ergo Lutherus ipse à Münzero in Epistola ad Mülbust. postulavit miracula in testimonium immediate vocationis, si fallax est hoc argumentum? Sed R. miracula requisivisse Lutherum à Münzero, non quòd illis solis vim sufficientem tribueret ad immediatam vocationem, si fierent, adstruendam; comitari enim debet vocationem modus reformandi & immutandi publici Ministerii, teste ipsò Lutherò qui Tom. 2. Germ. Jen. Fol. 456. Wann Münzer sagt: Gott und sein Geist hab ihn gesandt wie die Apostel / so lasse ihn dasselbe beweisen mit Zeichen und Wundern / oder wehret ihm das Predigen / dann wo Gott die ordentliche Weisß will ändern / so thut Er allezeit Wunder; Zeichen darben / sed ut tantò potentiùs confunderet Adversarium, qui non tantùm Miraculis cum Scripturâ conjunctis, sed & nudis & solis destituebatur. Perges: *Si Miracula non probant immediatam vocationem, Ecclesiæ non posse constare de legitima vocatione immediate vocatorum, expositam esse erroribus, neq. unquam circa fidei dogmata, firmo pede consistere.* Sed falsò, tum enim sic se res haberet, si sola miracula immediatam vocationem demonstrarent, & nulla ab iis, qui se immediate vocatos dicunt, ederentur; residua enim sunt alia *remota*, de quibus alibi. Vide hanc Materiam prolixius in pronunciato V. Dn. D. Nicolai Charact. Anti-For.

Q U Æ S T I O II.

An in Malos Angelos cadant Miracula?

Sunt, qui ἐπεχσσι, prout Dn. D. Dannhawerus, cujus vide Meletema, alii affirmant, prout Montac. Orig. Eccles. p. 486. Scholastici verò distinguunt inter mirabilia, & miracula strictè dicta: illorum operationem Diabolo concedunt, horum verò negant. Et dextrè exiguo meò judiciò; constat enim miracula ad confirma-

tionem Evangelii concessa esse Marc. 16. v. 20. Si itaque Diabolus ministerialiter se non habet in prædicando verbo D E I, nec ministerialiter se habebit in confirmando eo. Instat ergo.

Q U Æ S T I O III.

An propterea nec impii & Hæretici miracula edant?

SECUS se res habet cum hujusmodi farinæ fociis; adest enim primò *Scumulus exemplorum*, Bileam prophetavit; Saul fuit inter prophetas; Judas cum aliis gloriatus est, sibi dæmones fuisse subiectos Luc. 9. v. 1. 10. Sic multi olim prætendent miracula edita, dicentes: *Nonne prophetavimus?* qui tamen sunt κακῆγοι, teste Christo Matth. 7. v. 22. 23. Proindè notanter cum Navarro Tanner. Tom. 3. Disp. 5. quæst. 7. qui vulgò *Salutatores* vocantur (quantumcunq; aliàs sint perditissimi homines) licitè possunt suo munere fungi, quoniam gratia illa gratis data hujusmodi hominibus à D E O solo conceditur in utilitatem aliorum. Similiter Augustinus l. 1. in Serm. Dom. de Monte: *Illud ad rem maximè pertinet, ne decipiamur tendentes ad contemplationem veritatis non solum nomine J E S U Christi per eos, qui nomen habent, & facta non habent (hoc est, vitâ & moribus sunt coinquinati) sed & quibusdam factis, atq; miraculis, qualia propter infideles cum fecerit Dominus, monuit tamen, ne talibus decipiamur, arbitantes ibi esse invisibilem sapientiam, ubi miraculum visibile viderimus.* Sed fortasse quis dicat, non posse iniquos visibilia illa oracula edere, & mentiri potius credat illos, qui dicturi sunt: *In Nomine tuo Prophetavimus, & demonia ejecimus?* Verùm secundo convincit nos *contradictionis negatio*, haud enim implicat, esse infidelem, & efficere Miracula: D E U S distribuit dona sua, prout vult 1. Cor. 12. v. 12. nec indissolubiliter cohærent μετὰ τοῦ δόξου, & ἀγάπῃ 1. Corinth. 13. v. 2. Quare Chrysostomus, Hieronymus, aliique probant exemplis, etiam per alios, quàm Catholicos, vera miracula fieri. Bellarminus ipse l. 1. de Grat. & lib. Arb. cap. 10. Dubitari, inquit, non potest, quia gratiæ gratis datæ à gratiâ gratum faciente separari possint, posse enim esse sine charitate donum linguarum, prophetiam, sapientiam, testatur Apostolus 1. Cor. 13.

¶ 2. ut de Stapletono aliisque nō dicam. Tertiò, imbecillitas Objectionis; non enim obstat, quod Forerus objicit in palma triumph. l. 2. 14. pag. 610. quando ait: *Nunquam permittit Numinis Bonitas & Veritas, ut vera miracula ad falsitatis comprobationem edantur, maximè ubi veritas cum mendacio de victoriâ & palmâ contendit, quemadmodum in certamine Moſis cum Magis Pharaonis.* Nam finis DEI à fine hominis planè distinguendus; hic malus est, ille ad bonum finem ordinatio. Dementare illi, ac nocere propositum, huic etiam per malum, imò invitum instrumentum inter impios homini benefacere. Si enim DEUS Nebucadnezari illicitis artibus, quò moveret exercitum, divinanti adfuit directione ad finem cœlitus intentum, quidnō Pseudo-Prophetam, Miracula patrantem, ad bonum finem, à DEO intentum, ducat? potest enim Pseudo-Propheta miraculum edere in confirmationem; suâ quidem mente cultus *Φανερῶς* religiosi, *δύτως* superstitiosi, sed ex directione divina veritatis adhuc residuæ in cultu hæretico. Sic cū Judæus quidam à Paulo Novatiano Episcopo baptizari vellet, jam antea baptizatus, modò ut quæstum faceret, fontis baptismalis aqua evanuit. Conformiter hisce D. Gerhardus: *constat*, inquit l. 2. spec. Conf. Cath. art. 5. c. 4. p. 1263. *Judæos illos ac Samaritanos, quos Rex Assyriorum, abductis decem tribubus, in terris suis reliquit, non habuisse puram religionem, & cultum veri DEI; nihilo minus tamen DEUS misit Leones in Assyrios, & alias exoticas gentes in Samariam introductas, pepercit verò indigenis; annè in confirmationem impii cultus? minime; sed ad confirmationem legis judaicæ.* De quibus plura in Meletem. Dannhaw. Imminet.

S E C T I O V.

Quæ agit de Materiâ, vel Objecto Miraculorum.

MEminimus autem rectè hominum, cœlestium, sublunarium, mineralium, elementarium, aliorumque inanimatorum; quot enim gesta & quanta fuerint facta miracula circa homines, tam V. quàm N. Testamentum abundè monstrat; Elias namque viduæ

viduæ, Elisæus verò Sunamitidis filium ex mortuis resuscitavit, Filius DEI cæcis visum, claudis locomotivam, leprosis mundiciem restituit Matth. 11. v. 5. Petrus claudum salientem fecit, Æneam paralyti liberavit; ut taceam, & Pauli sudaria salutaria fuisse, Actor. 19. v. 12. Cœlestia quod attinet, Josua solstitium impetravit, olimque erunt signa in Sole & Lunâ, teste Christo Luc. 21. v. 25. Elementaria verò ne præteream, Elias ignem cœlò deturbavit, Moses & Aaron aquam in sanguinem, Christus verò in vinum mutavit; Sic nec reliqua probatione indigent, Moses enim aquam ex Petra produxit, baculum, inanimatum quid & rigidum, in vivum flexilemque convertit colubrum, quem imitati Magi Ægyptiaci, de quibus

QUÆSTIO UNICA.

*Quid de serpentibus eorum statuendum sit,
veri ne, an apparentes tantum fuerint?*

SUnt hîc divortia sententiarum, & quævis, fateor, *verexōs* sonant. Josephus, Justinus, Tertull. Ambros. ut & D. Sigwartus noster B. M. aliique arbitrantur, serpentes illos non nisi præstigias, sensuumque illusiones fuisse, conformiter Philoni, qui Sap. 17. v. 7. Das Gauckel: Werck der schwarzen Kunst lag auch darnider / und das Rühmen von ihrer Kunst ward zum Spott. Prætendentes secuturum aliàs 1. Diabolum rerum formâs immutare posse, 2. Filium DEI potentiâ æquaturum, si non superaturum; quia majus sit, virgam in serpentem, quàm aquam in vinum convertere. 3. Creaturam in se recipere posse aliam ejusdem speciei & quantitatis cum sui conservatione, quia coluber Aaronis alios deglutiisse dicatur, quod impossibile. 4. Colubros magorum produxisse fœtorem, prout ranæ à Mose productæ, & collectæ; altum verò esse in Scriptura silentium, ut pluribus Joh. Scharpius in Symph. Proph. & Apostolorum pag. 120. Verùm enim verò an *αἰσῶν* hæc accuratioris judicii sustineant, dubito; enervatur enim modò recensita sententia indè, quia expressè dicitur: Primò virgas Magorum ita in serpentes mutatas esse, ut postea à virga Aaronis deglutitæ sint, & absorptæ; si itaque rea-

lis fuit devocatio, etiam realis fuit existentia serpentum, aliàs non ens fuisset devocatum, quod implicat. Secundò expressè dicitur Magos fecisse prout Moses, à quo literali sensu non est discedendum, Moses enim detexisset fraudem, nec DEUS passus fuisset Mosen falli. Sigillatim verò & ad primum Argumentum, negando conseq. non enim sequitur: veri fuerunt serpentes, ergò Diabolus rerum formas invertere potest. Ad secundum, verò nondum dari æqualitatem potentiae, quia nondum probatum, à Diabolo conversas esse virgas; quomodo autem surrexerint serpentes, in sequentibus patebit. Ad tertium & opus fuisse planè miraculosum, & proindè leges naturæ cessasse. Ad quartum, negando conseq. quia compendiosior est S. Scriptura, quàm ut quævis recensere debeat; si enim ranæ Mosaicæ foetorem excitarunt, potiùs Magicæ. Pro veritate vicissim serpentum pugnant Philo, & Origenes aliique prætendentes S. Scripturæ expressum textum, qui refert, 1. virgas Magorum conversas esse in serpentes prout NB. virga Aaronis; 2. devoratas esse. 3. Magos sic fecisse quemadmodum Moses. Et horum sententia non tam Delrioni, quàm aliis Orthodoxis solidior visa, cùm à literali sensu temerè & extra necessitatem non sit recedendum; tamen ut horologia, dissonant; alii enim, nempè Pererius, Lyranus, & Abulensis existimant, Diabolum non advertentibus spectatoribus virgas subtraxisse, & earum locò veros supposuisse serpentes, quò & Cyrillus tendit l. 7. in Joh. c. 8. alii vicissim, nempè Cajetanus & Augustinus urgent ex veris virgis, ut ex materia præexistente, veros prodiisse serpentes acceleratione causarum secundarum, ita enim Augustinus: quæst. 21. in Exod. *Insunt rebus corporeis elementa & seminaria rationes, quibus si obducta fuit opportunitas temporalis, & causalis, prorumpunt in species debitas sine modis, & finibus, & sic non dicuntur Angeli, qui ista faciunt, animalium creatores, sicut nec agricolæ segetum, vel arborum, quamvis noverint præbere quasdam visibiles opportunitates vel causas, ut illa nascantur: DEUS verò solus Creator est, qui causas ipsas & seminarias rationes rebus inseruit.* Cajetanus verò: *Sunt hæc animalia insecta, & de numero imperfectorum, quæ Diabolus brevi tempore ex putrefactis virgis potuit producere, neq. id vires ejus superat,*

nam, quod solis calor multis diebus efficeret, id ille potest exiguo tempore, applicando activa passivis, quæ novit ad hoc efficaciora. Item: Serpentes fuere realiter ex virgis producti, non quidem per immutationem formæ substantialis à Damone factæ, sed per adductionem agentium naturalium maximè efficacium, & invisibilem applicationem illorum ad virgas, ut benefició illorum agentium per celeres alterationes exiverint virgæ putrefactæ in serpentes. Et hæc sententia, si problematicè licet agere, præprijis arridet tenui meo judicio, salvis aliis, & inculpatis: quia si in antecedentibus S. Scripturæ est inhærendum, nempe Magos fecisse similiter, & consequentibus, nempe ratione eventus, inhærendum erit: ait enim sacer codex, virgas versas esse in colubros, & non aliunde allatos. Dices: Scripturam S. ex opinione & deceptio Spectatorum judició dicere: Da wurden Schlangen daraus. Sed quis credet Mosen deceptum fuisse in Actu hoc, & quis temerè S. Scripturæ vim inferet? cum nullum αἴτιον metuendum. Instabis: Secuturum, vel Diabolum formas substantiales invertere posse, vel Deum sibi ipsi contrarium fuisse, quia Jannes & Jambres Mosi restitisse dicantur. 2. Timoth. 3. vs. 8. Sed & prius haud sequi, cum Diabolus se tantum habuerit dispositivè, activa passivis artificiosè applicando, cum interim seminariæ rationes divinitus insint rebus corporeis: nec posterius metuendum, tum enim sibi ipsi Deus contrarius fuisset, si perseveranter & positivè machinationibus Magicis adfuisset, nec sapientissimè colubros Magorum mediante virgâ Aaronis deglutivisset; unde appositè Augustinus lib. 3. de Trin. Ideò mira facere permissi sunt Magi, ut mirabilius vincerentur. Tantum de Materia sive Objecto. Trudit hoc

SECTIO VI.

De

FORMA MIRACULORUM,

Consistit autem ea in τῷ ὑπερφυσικῷ, καὶ ὑπερτακτικῷ, ut sit super & præter ordinem universæ naturæ factum. Hinc Thomas Aquin. de Sent. l. contra gentes c. 97. illa, inquit, simpliciter Miracula sunt dicenda, quæ divinitus

nitus fiunt præter ordinem communiter servatum in rebus. Latius verò, imò accuratius Beatus noster D. Nicolai, Præpositus quondam Stuttgard. Meritissimus, quando pag. 404. Charact. Anti-For. scribit: *Miracula, ut vera videantur, debent certa habere fundamenta, 1. quòd vera sint, non præstigiatoria, 2. quòd à DEO proficiscantur, 3. quòd creatis viribus fieri non possint, 4. quòd ad salutem hominum tendant.* Cui conformiter Brochmanus loc. de Eccles. pag. 286. quando ait. *Ut opus aliquod sit verum miraculum, duo requiruntur. 1. Veritas rei, ut, quod videtur esse opus, reverà sit, 2. veritas finis, ut veritati confirmandæ verè serviat.* Undè

Q U Æ S T I O I.

*An Miracula recipiant magis & minus,
i. e. alia alia superent?*

Affirmativam obtrudit nobis primò, ἡ ἀδείξις miraculorum, majus enim opus magisque admirandum fuit incarnatio Christi, secundi Homini de Cælo 1. Cor. 15. v. 45. quàm productio Adami, Homini terreni, quem tamen mirabiliter finxit Plasmator DEUS: illa enim ὁμολογεῖται μέγα μυστήριον vocatur 1. Timoth. 3. v. 16. hæc non. Et quis, dubitat miraculosè solem obscuratum fuisse tempore mortis Messianæ? Sed & quis negat majus fuisse opus occasum solis Justitiæ, nempè obitum vitæ, Domini Gloriæ 1. Corinth. 2. v. 8. Secundò, Confessio Christi, qui ipse fatetur, majora edituros esse opera credentes Joh. 14. v. 12. Hinc in gradus distinxit Miracula Thomas Aquin. quando loco supra allegato: *Summum inquit gradum inter Miracula tenent, in quibus aliquid fit à DEO, quòd Natura nunquam facere potest, ut quòd sol retrocedit & stat, quantò enim aliquid magis remotum est à facultate Naturæ, tantò majus miraculum est.* Secundum gradum in miraculis tenent illa, in quibus DEUS aliquid facit, quòd Natura facere potest, sed non per illum ordinem. Opus Naturæ est, quòd animal vivit, videt, ambulat; at post mortem & privationem potentiæ naturaliter non potest reviviscere, videre & ambulare.

bulare. Tertius gradus est, cùm DEUS facit, quod consuetum est fieri operatione Naturæ, tamen absq; principiis naturæ operantibus: ut cùm pluit sine operatione principiorum Naturæ. Quibus omnibus addo illud Chrysostomi: Qui Diabolum vincit, maximum facit miraculum.

Q U Æ S T I O II.

An, & quomodo vera miracula dignosci possint?

VARIOS excogitavit characteres Lessius, nempè: 1. Orbis testimonium, 2. operum magnitudinem, 3. soliditatem, 4. gentium conversionem & morum correctionem, quæ miracula sequuta est. 5. Simpliciter eorum, qui illa fecerunt, & mores à commercio Diaboli alienissimos, 6. auctoritatem testimoniorum coævam eorum, qui ea vel viderunt, vel ab aliis, qui viderunt, acceperunt. 7. Beneficentiam, an enim, quærit Scribanus, irrogata beneficia arbitraris ultroneâ munificentia obtrudere Dæmonem? ut, dum DEUS oratur, dum diva nostra, aut divorum alius, Dæmon munera pluat? ab illo hæc speras, qui morsu, nescio, an secundo vetiti pomi saturatos primos parentes, cùm vitam promisisset, eructare fecit in mortem? 8. Ipsum rerum sensum, quæ enim, pergit Scribanus, insana libido, sensus in nobis damnare, quasi aliud nobis renuncient oculi, manus, aures, quàm viderint, palpaverint, audierint. 9. Cultum ejus, qui Satanæ hostis est, & quis, ait Forner, monstrosus ille Dæmon, qui suæ ita naturæ adversatur, ut, cùm alias cœlitibus sit extremè infensus, Regina cœlitum cultui nunc tantâ industriâ inservire contendat? Verùm, quàm malè suô fungantur officio recensiti characteres, in instanti patebit. Nîl autem juvat 1. orbis testimonium, quia plurima sunt tradita, quæ rerum natura nunquam vidit, hinc ipse Gretser: quæ huc usq; sive affirmata sive relata sunt, si non omnia facilia creditu, saltem jucunda sunt lectu. Claudius verò Espencæus in serm. 1. Synod. p. 921. Hodierni canes, aut muti sunt, non valentes latrare, aut è Cathedralâ jam non Moysis, sed Domini nostri Jesu Christi impudenter

C 2

juxta

juxtà ac imperitè recitant pro historiâ fabulam, pro veritate mendacium, pro Ecclesiasticis hæretica, pro seriis joca, pro virtute DEI fictitia miracula, ne dicam Dæmoniorum portenta. Nîl 2. operum magnitudo; Diabolus enim tam speciosa edere potest miracula, ut, si possibile esset, electi seducerentur; nec sumus tantâ perspicaciâ, ut *μυειοτεχνίτης* nos haud fallere possit, aut rerum naturalium earumque virium tantam præsumere debemus scientiam, ut non impingamus. Nîl 3. soliditas; quia non tantum oculi strigia à Satanâ fieri possunt, sed & solida mira; non enim, teste Augustinô, quando ignis de cœlo cadens Jobi familiam cum pecoribus uno impetu absumpsit, phantasma fuit, quod tamen Satanæ, cui DEUS hanc dederat potestatem, opus fuit. Nec 4. gentium conversio; quia nonnulli per impios & Pseudo-Propheetas convertuntur, Philipp. 1. v. 18. Hinc Espencæus cum Augustino: *Mentem nostram justificando formare non potest nisi DEUS, prædicare verò extrinsecus & homines possunt, non solum boni per veritatem, sed & mali per occasionem.* Nec 5. mores externi, quia ipse Diabolus transformat se in Angelum lucis, & non nemo in sanctitate incedit Angelorum daß er nie keines gesehen. Col. 2. v. 18. Nec 6. auctoritas testimoniorum; historici enim & Authores vel Coævi, vel aurti tantum fuerunt, vel si oculati, testari possunt de factò, non liquidò de miraculo facti, ne dicam sanctos errare posse & falli, teste Salmerone & ipso Bellarm. Notanter Lud. Cellotius Jesuita in Oratione, cujus titulus: *In sola S. Scripturâ Veritas invenitur: Dicam audacter, quod sentio, ne equalibus quidem suarum historiarum Scriptoribus temerè esse credendum. Ante annos enim plus minus octo in vivis esse desit is, qui regis stipendiis alebatur ad historiam Henrici M. conscribendam, nil isto loco exprobrandi causâ, sed commonendi gratiâ dicam: Optimos & religiosissimos viros audivi, qui dicerent, se præliis & urbium expugnationibus interfuisse, quæ longè secus quam evenissent, ab historico narrabantur. Nominabant quin etiam duces nonnullos, quibus victoriæ laudem assignat historicus, quos illo die neq. locum illum, neq. arma vidisse, constaret.* Nec 7. beneficentia, quia encomia sanctorum etiam à Diabolo quandoque proficiscuntur Actor. 16. v. 17. & beneficia Dæmonum

fue-

fuerunt, quæ de miris Vespasiani, Æsculapii memorat Baron. anno 71. 6. ann. 139. 4. Ex Leone M. notat Forner. l. 2. palm. c. 17. p. 627. *Hominem persequi dæmones non solum vi apertâ, sed & clanculariâ, dum se beneficos simulant. Et porro: Beneficia Dæmonum omnibus sunt nocentiora vulneribus, & tutius est homini inimicitiam Diaboli sustinere, quàm amicitiam quærere, non enim unquam cessat à nocumento corporali, nisi ut gravius noceat in animâ. Nec S. rerum sensus; quia nil novi, sensus papæos falli; in S. enim *ἐν ταῖς αἰσῶσι* sensus humanus errat perpetuò, quia videt colorem, gustat saporem, sensu communi apprehendit quantitatem & figuram, omnia panis, & tamen panis non est, quem sentit esse, sicut contingit illi, qui glaciem putat esse crystallum. Nil, ait Scribanius, potentius in Dæmonibus, quàm phantasmate ludere, ut quæ non sunt, esse credas, & oculos fallaci fascino tenebrare, aut intermedii factitii aërii interkursu non possidenda possidere, proponere. Nec tandem cultus sanctorum; quia cultus ille speciem habet Mariodulix, terminatur verò in Dæmonia. Maria enim huiusmodi cultum recusat, ut in Hodom. D. Dannhawerus monstrat, cuius securi hætenus sum usus. Dices: si recensiti characteres nil præstant, an ergò planè non dijudicari possunt aut discerni Miracula? Notandum hîc, quid ipse Bellarminus de Miraculis statuât: Non constat, inquit, nobis certitudine, cui non possit subesse falsum, illam non esse illusionem Dæmonis. Maximè verò perpendenda, quæ in victus D. Nicolai pag. 128. charact. Anti-For: *Tanta est miraculorum verorum & falsorum similitudo, ut, quamvis ea ex se spectata immensò intervallò dissideant, (quippe alia à DEO, alia ab impostoribus Angelis profecta sunt, alia ad potentiam DEI activam infinitam, facientem in creaturâ, & de creaturâ, quicquid vult, alia ad seminales rationes à DEO in primordia sua referunt, alia ad erudiendum, alia ad pervertendum fiunt, alia verè fiunt, alia sensus & oculos ludunt, ut videantur quod non sunt:)* tamen quoad externum aspectum & contuitum, discerni ab eo, qui in solo externo visu occupatum animum habet, non possint. Exemplò sunt Miracula Mosis & Aaronis, qui virgam converterunt in Colubrum, idem de suis virgis fecerunt Magi, unum est in quo defecerunt cyniphes non potuerunt producere, ve-*

rūm id non ipsorum impotentia, sed DEI prohibitioni tribuendum putat Alexander de Ales. Exemplo sunt Miracula à Christo præ-nunciata, tanta enim futura ea dixit, ut si fieri posset, etiam electi seducerentur. Si distantia verorum & falsorum tanta est, ut visu & sensu possint dijudicari, unde tantum etiam electorum periculum? Anti-Christus imaginem bestiae vivificabit, quantum hoc interest, mortuum aliquis vivificet, an imaginem, cui per naturam vita repugnat? Judica ex visu, & sensu, & Anti-Christum vel DEUM, vel saltem DEI Prophetam habebis, unde DEUS miracula Pseudo-Prophetae non ex se ipsis, sed ex Doctrina vult judicari, ut tum caveantur, cum à DEO unico abducere deprehenduntur, prout & Christus non vult audiri Pseudo-Prophetas, cum à communi Ministerio Prophetarum, & Apostolorum doctrinā ad sua penetralia & eremum vocant. Quod & Forer ipse; quando: Non Doctrina ex miraculis, sed ex miraculis Doctrina æstimanda est.

Q U Æ S T I O III.

Quid de Miraculis Pontificiorum judicandum?

Q Uantum sua extollant miracula Pontificii, quantumque sese jactent, tonsoribus est notum Lippisque. Verum, quod Hanna olim, id pro nunc nostrum facimus, nempè lasset euer Groß Rühmen / und Trohen / lasset auß eurem Munde das alte 1. Sam. 2. v. 3. Cinerem enim si spargit Daniel, vestigia ilicet deprehenduntur fraudulentorum Sacerdotum; fraudis enim foetus sunt partim miracula Papæa, deceptionisque fructus, quod patet ex Xaverii confessione, cum enim ipsi mortui exsuscitatio imputaretur: *ô me nequam*, clamavit, *juvenem ad me mortui specie attulerunt, jussus à me surgere nomine DEI, surrexit, ea videlicet res populo res nova visa.* Partim fabulosa adeò, ut vel Heraclyto risum exprimant; quis enim credet, Divum Franciscum pediculos semel excussos in se ipsum rursum immisisse? Sanctum Aidum S. lupis esurientibus S. bidentes ex commiseratione dedisse, postmodum verò bidentes jam devoratos à lupis creatione suā integros ex ventri-

ventribus luporum recepisse. S. Bernaci vaccam à furibus occisam, in frustra dissectam, inque lebetem jam positam, mugitum ad vocem ejus auditam è lebate edidisse. Partim αἰσιῶτα omninò, Pistillò enim retusior sit oportet, qui credit precibus fratris Conradi animam quondam è purgatorio liberatam esse, ipsique peractis gratiis vidente Conrado in Cœlum conscendisse. Dunstanum Diaboli nares forcipe tenuisse, crebrisque verberibus virgam in tergo ejus fregisse. Ignatium Lojolam, hominem, qui è paupertatis aliarumque calamitatum tædio laqueo vitam sibi finierat, collocatum in lectulo tantisper à morte suscitasse, quoad usque Sacram confessionem Sacerdoti fecisset. Ut transsam, quòd de Garnetto Cornelius à lapide refert, nempè in spica Reguidæ, & sulphurarii proditoris sanguine tinctâ vividam faciem humanam apparuisse, imaginem ejus coronâ fuisse cinctam in Capite, in Fronte crucem rutilasse stellæ inclusam, sub mento, alatum Cherubinum esse visum. Partim denique blasphemam; horrendum enim dictu, Diabolum non cessasse ex puella obsessâ imploratâ ope Trinitatis; cessasse verò invocatâ Loretanâ. Dicit hîc papicola, me tantum recensere Leviuscula, missis potioribus, & calculò dignis; sed noscitur ungue leo, vel enim ad alteram recensitarum classium referenda, vel si unquam vera contigere miracula, gloriari tamen Pontificii haud possunt, quia uni Ecclesiæ alligata haud sunt, nec in probationem ἐπεδοξίας, sed residuorum incorruptorum fidei articulorum edita.

Q U Æ S T I O. I V.

Quid in specie de Patre Aviano, Neoterico

Mirabiliario judicandum?

TRia in eo observanda judico, 1. Personam ejus & professionem, 2. gesta, 3. modum procedendi. Personam quod attinget, Italus ille est, redivivus Seba, qui ante biennium ex Italiâ Tyrolum, & Austriam, hincque fines Rheni pervagando, Coloniâ tandem, imò Augustam Vindelicorum pervenit, Ordinis Capucini, adeoque de societate eorum, qui nudipedales aliàs, si-
ve ex-

ve excalceati dicti, & proindè in ipso jure Papali pro hæreticis habiti, de quibus olim Hieronymus: *Viros fuge, quos vides nudis incedentes pedibus.* Facta verò infecta ut referam, Colonienſes relationes aliaque opuscula edita multa de Aviano jaçant magnaue ad Calendas Græcas non probanda: ajunt enim papicolæ, P. d'Aviano leprosum mundâſſe, mulierem ſervumque à Satanâ liberâſſe, cœcis viſum, claudis locomotivam, mutis linguæ uſum, ſurdisque competens reſtituiſſe ſenſorium. Modum verò procedendi ut exhibeam, notanda quatuor: *Primò*, exordium ſanandi, facturus enim miraculum peculiari uſus eſt benedictione, quando: *Benedicat tibi Dominus & custodiat te, liberet te ab omni malo ſecundum tuam fidem, omnia enim credenti poſſibilia.* Cui præmiſit tritum illud Pontificium: *Jesus Maria!* *Secundò*, medium, namque ex parte ſui uſus eſt aquâ benediçtâ, quam reliquit ægrotis, non enim in inſtanti, quod notandum, convaluerunt, ut eâ ſe delinirent; ex parte verò ægrotorum ſubdolè poſtulavit fidem, ut firmiter crederent Divinâ miſericordiâ ſe ſalvos fore, ita enim Avianus: *Qui indubitatâ fide perſeſce- rant, ii inſallibiliter omnipotentiam DEI ad reconvaſcentiam ſentient.* *Tertiò*, requiſita alia: exegit enim Avianus (1.) ab iis, qui benediçtionem ſuam ambierunt, confeſſionem ſacramentalem, vel ad minimum contritionem, cum propoſito emendandæ vitæ, (2.) ut crederent omnibus Sacerdotibus N. T. concedam eſſe poteſtatem manus imponendi ægrotis, & reſtituendi eos. (3.) Ut in honorem Mariæ ter *Orationem Dominicam*, totiesque *Ave Maria* recitarent, prout ipſe quotidie: *Nos cum prole piâ benedicat Virgo Maria.* Ultimum tandem, quod notandum, eſt intentio Aviani: demonſtrare enim voluit Miraculis ſuis Mariam ſine labe originali conceptam eſſe. Quæ narrâſſe ſit refutaſſe; nimis enim extenderetur labor meus, videatur verò Joh. Scheible- rus, Paſtor Gieſſenſis, qui nervoſè de Aviano in Opusculo Germaniæ. Ave ergò Aviano non dico.

Q U Æ S T I O V.

*Quid de Ethnicis, Magicisq; statuen-
dum Miraculis?*

R Esp. gradum ea verorum miraculorum non pertingere, de-
est enim ipsis adæquatum constitutivum, nempe πένθος φαν-
ερόν. Ethnica enim quod concernit miracula, traditur quidem
Vespasianum cæco visum, claudo manûs usum restituisse; verum
credibile judicat Tertullianus, utrumque morbum à Diabolo il-
latum esse, qui oculo illius, & membro hujus insidens, membro-
rum usum impediit, & id eò fine, ut cùm desineret nocere, vide-
retur sanare. Fucum (1.) intercedere, ex Adriano constat Impe-
ratore, ministros enim ejus recenset Spartianus, ut illum vivendi
tædiò affectum à desiderio mortis revocarent, accedere ad ipsum
diversis temporibus fecisse mulierem quandam aliumque virum
cœcitatem fingentes, quasi in somniis essent moniti, ut Adriano
significarent, eum sanitatem recuperaturum, quemadmodum &
ipsi, cùm corpus ejus tetigissent, visum recepturi essent, his enim
artibus distentus Adrianus in annum sequentem vitam prorogavit.
Magica verò quod attinet, sapiunt & ea virtutem Dæmonis, &
sunt, vel præstigiatoria, quando nempe Diabolus hominibus im-
ponit 1. verum Objectum removendo. 2. Falsum & phanta-
sticum objiciendo, vel verum etiam Objectum peregrinâ specie
pingendo, 3. sensus hominum pervertendo. Vel vera quoad
έναντιον, nempe quæ consistentiam habent, & mira quidem sunt,
non tamen Miracula, quia non supra naturam ac potentiam Dæ-
moniorum, sed ab iis fiunt, vel celerrimò motu locali, vel appli-
catione activorum ad passiva, vel aliis modis, quos etiam Sesqui-
Illyssis intellectus capere nequit.

S E C T I O VII.

TEndimus tandem ad finem Miraculorum, qui vel
primarius, nempe Doctrinæ divinæ Confirmatio Matth. 10.
vs. 7. Marc. 16. vs. 20. fideique ingeneratio Joh. 21. vs. 12. vel
D
ulti-

atimatus, nempè Demonstratio Gloriæ Jesu Christi Joh. 2. v. 11.
Undè

Q U Æ S T I O I.

An adhuc in plantatâ Ecclesiâ necessaria sint Miracula?

QUod negamus, acquisitio enim sine quiescunt media ad finem ducentia, sumus enim in illo corpore, in quo Prophetæ, & Apostoli Miracula fecerunt; undè continuatione non opus est. Appositè Augustinus: *Erant olim necessaria Miracula, ut crederet mundus, priusquam crederet mundus, quisquis autem adhuc prodigia requirit, ut credat, magnum est ipse prodigium, qui mundo credente non credit.* l. 22. C. D. c. 81. Similiter Gregorius M. homil. 29. in Evang. *Necessaria fuerunt in exordio Ecclesiæ signa, ut multitudo ad fidem cresceret, quia & nos, dum arbusta plantamus, tam diu aquam ipsis infundimus, quo usq; ea in terra coaluisse videmus, & si semel radicem fixerint, irrigatio cessabit.* Notanter quoque Chrysost. in Joh. hom. 24. *Νῦν π μὴ καὶ νῦν σημεῖα γίνεσθαι, εἰ ὃ πιστὸς εἶ, ὡς εἶναι Χρὴν, καὶ φιλεῖς τὸν Χριστόν, ὡς φιλεῖν δεῖ, & Χρῆσθαι ἐχέεις σημεῖων, ταῦτα ὃ τοῖς ἀπίστοις δίδωται.* Ergò crede, ait Didacus Stella: *Crede Evangelio, quod fuit miraculis confirmatum.* Sed dices: *Nonne rationi consentaneum, ut nunc quoq; fides miraculis confirmetur?* Non, nam nunc quoque damnum magis afferrent, quàm commodum, etiamsi in primordio Ecclesiæ nascentis fuerint necessaria, cùm enim puer ambulare nequit, adjuvatur vehiculò, quod homini adulto est impedimento. Quapropter nullum expectatio signorum retardet, amet potius miracula pietatis, ut Chrysost. & Gregorii nostra faciamus.

Q U Æ S T I O II.

An & Luthero necessaria fuerint Mi- racula?

QUicquid ogganniat Forerus, negativam nos arripimus sententiam, nullam enim primò novam protulit Doctrinam
Mega-

Megalander, sed suppressam, Pontificiisque quasi sepultam tenebris ὁσφοδοξίαυ luci reddidit; & si vel maximè novam Doctrinam attulisset, ea tamen Miracula haud necessariò annexa habuisset: Johannis enim Baptistæ Doctrina opinione Phariseorum maximè nova fuit, novum similiter Sacramentum, & tamen ἀνομιὰ fu-
 it Joh. 10. v. 42. Novum quoque erat dogma Prophetæ Semajæ, Roboamum à bello retrahentis, potuisset enim Roboam præten-
 dere justam belli causam, nempè injustam defectionem decem-
 tribuum, interitum quæstoris, licentiam recuperandi regni, nec
 tamen miraculò se legitimavit Semajas. Falsò ergo Moguntini
 in animadversion. Antib. p. 120. *Sanè nisi Christus & Apostoli*
fidei faciendæ causâ eâ portenta patrâssent, non tenebantur profe-
ctò Judæi credere, sed poterant jure meritò argumentò ab anti-
quitate sumptò Evangelium repellere: Sequeretur enim nec Johan-
 ni credere debuisse Judæos, ejusque baptismum impunè contem-
 plisse, quod tamen negatur Luc. 7. v. 30. *Secundò, conformiter e-*
git Lutherus Josiæ Regi, sine concursu miraculorum librum legis
aliquantisper ex oculis sepositum rursus promulganti; quid ergò
Luthero miraculis opus fuit? cùm Doctrina ejus jam veteribus
suffulta fuerit miraculis. Nec, tertio, rem habuit cum infidelibus,
sed Christianis, utut fece ἑταροδερσινίας conspurcatis. Nec, quar-
tò, mutavit publicum Ministerium, quod enim urgente necessita-
te quandoque sartores, sutores aliique plebeji docuerunt, novum
haud fuit, quia in primordio Ecclesiæ id ipsum evenit; piscatores
enim textoresque evasere Doctores, quodque Megalander Eccle-
siam ab idolo Missatiko ad verum unicumque Christi Sacrificium
revocavit, tyrannicumque Pontificis fastum repressit, laudabili-
ter fecit, prout Josias, quia abusus ejusmodi indecenter invaluere;
absurditatem ergò partim, partim cœcitatem suam prodit Forerus,
dum Miracula ultrò requirit, nec conspicit præ oculis tam stupen-
dum opus. Audiamus Meliorem Melchiorem, qui talia in cha-
ra& pag. 134. Non est universaliter verum, Lutherum nulla pa-
trâsse Miracula, nam evolventi annales temporum, & secum re-
putanti, quantâ superbiâ & fastu Pontifex Romanus fulmine ex-
communicationis armatur, & populorum stultâ credulitate anima-
tus maximorum & potentissimorum Imperatorum, Regum princi-
pumq;

pumq; capitibus insultârit, quantâ securitate decretales suas magnâ ex partē ineptissimas, orbi Christiano venerandas, credendas & exosculandas obtruserit, Miraculum omnium miraculorum maximum, & divinæ cooperationis certissimum τεκμήριον videbitur, tantam hanc molem, tantis seculis, tantô studiô & curâ exædificatam, unius inermis Monachi nullâ auctoritate, nullâ externâ potentiâ suffulti voce quasi repentinô impetu labefactatam, & multis in Imperiis, Regnis, Provinciis vel totam ex imis fundamentis erutam vel magnâ ex parte destruatam. Audiamus ipsum quoque Bellarminum, qui in Præfat. Tom. 1. fatetur, unum Monachum rem tam felici successu perfecisse, & Throni papalis terrorem calamô, in quo tot Principes armis infirmandô frustra fuere, deiecisse, conscientias jugô traditionum ligatas, anathematum terroribus attonitas, & Manliani Imperiis pressas illuminasse, compedibus liberasse, exitum præbuisse è captivitate Babylonicâ liberum, de quibus appositè Poëta:

Roma orbem domuit, Romam sibi Papa subegit,
Viribus illa suis, fraudibus iste suis.

Quantum istô Major Lutherus, Major & illâ
Orbem urbemq; unô qui domuit calamô.

Si itaque inter beatæ virginis miracula referendum, quod multos captivos è carcere politico liberavit, an minùs miraculum fuerit, Lutherum tot millia ex carcere spirituali liberasse? Quis dubitat impletum esse in Luthero, quod Fridericus Elector ter somniâsse fertur: Suidnicæ nempe, Monachum, comitatum sanctis, ad se venisse de cœlo, consensumq; ut quedam ostio Academico inscriberet, petiisse, scripssisse verò tam literis insignibus, ut Scriptura etiam Suidnicæ legi posset, finem calami Romam usq; se extendisse, utramque aurem Leonis ibidem jacentis penetrâsse, indè ad coronam tripitem Pontificis se exporrexisset, eam adeò commovisse, ut casura esset, audivisse verò Monachum pennam istam accepisse ex alâ Anseris Bohemici teste Anton. Musâ ex relatione Spalatini. Maximum miraculum conversio gentium visa Gregorio M. similiter Hieronymo inter omnia signa, quæ fecit CHRISTUS, hoc visum mirabilius esse, quòd unus homo, & illo tempore contemptibilis & in tantum vilis, ut postea crucifigeretur, Scribis & Phariseis

contra

contra se sævientibus, & videntibus lucra sua destrui, potuerit, ad unius flagelli verbera tantam ejicere multitudinem, mensasque subvertere, & cathedras confringere, & alia facere, quæ infinitus non fecisset exercitus; igneum enim quiddam radiabat ex oculis ejus, & divinitatis Majestas lucebat in facie. At majus istò interior illa non solum Glossarchia, sed & cordiarchia, quæ & asinos, Discipulos rudes ἀρχαῖους, & pueros fecit loquentes, ac laudantes, & asinarum Dominos, Mercenarios, lucrique cupidos furti specie primùm laceffitos & contradicentes domuit, inclinavit, volones quasi fecit. Ita, quam reformationem templi flagellis armatis non potuere Reges Augusti, Principes, provinciæ, DEUS per Lutherum effecit, linguas laicorum dudum mutas animavit, inque laudes divinas, & Psalmodias inflammavit, corda etiam dura movit, ut veritati locum darent. Ut pluribus Dominus D. Dannhawerus in Melet. cujus abietem totaliter amputare vereor. Imminet ergò

Q U Æ S T I O III.

An Miracula sint nota Ecclesie?

PRO affirmativâ horrendum pugnant Pontificii; ita enim Maldonatus: Sequitur necessario, eam, in quâ frequentia & quasi ordinaria miracula nulla fiunt, eam veram Ecclesiam esse non posse, quia scimus Christum Ecclesie suæ potestatem ad facienda miracula dedisse, unum hoc intendens, ut Ecclesiam Romanam pro verâ venditet. Expressè etiam Baronius: Dotem Miraculorum, non nisi in Ecclesia catholicâ reperiri, nec ab aliis usurpari posse. In forma verò syllogisticâ ita procedit Forer: Illa est vera Christi in terris militans Ecclesia, quæ tùm in se omni seculo, tùm etiam circa controversa cum hæreticis modernis dogmata Miraculis est admodum illustris, toti orbi conspicua & nota; Sed Ecclesia Romano-Catholica talis est Ergò. Item: Aut, quæ tot authoritatibus, tot fide dignis assertionibus roborata recensuimus miracula, vera DEI opera & prodigia non sunt, aut DEUS qui non nisi veritatem testari potest, veræ, quæ ab ipso est, Religionis & fidel ea tanquam signacula & tesseræ affixit? Verùm quàm curvos

figat gressus Forerus, vel captivus videt Zedekias, quæ enim absurda non sequuntur tam absurda vestigia? Stante enim maiore propositione prioris Argumenti, Ecclesia primò judaica, vinea olim à DEO plantata, hæretica fuit; dolenter enim Aflaph. Psalm. 74. unsere Zeichen sehen wir nicht: Hæretica secundò fuit Ecclesia à Johanne plantata, quia ἀστυς fuit, nec signis conspicuus: Hæretica tertio & adulterina erit ipsa Pontificia Ecclesia, quia nec illa omni seculo miraculis claruit, cur enim nulla coram nobis edunt miracula? Cur in locis tantum inaccessis peraguntur? & sic consequenter Existentia Ecclesiæ Militantis Ens erit chymericum, quod ἀνύπαρκτον, aut oriatur pluralitas Ecclesiarum, & quævis vera erit, quod itidem absurdum, quia & hæretica Ecclesia quandoque miraculis claruit; Donatus enim oravit, & respondit ei DEUS de cælo; Paulus Novatianus Episcopus, cum esset baptizaturus Judæum, malitiosè simulantem Christianam fidem, aqua de repente evanuit. Imò Ethnica; Cicero enim inquit initio belli Marfici Deorum simulachra sudasse, & fluxisse sanguinem; Ut præteream, quod refert Valer. M. l. 8. de aqua cribro hausta, Sil. verò Ital. l. 2. belli punici de navi Zonæ adducta. Sic utraque Ecclesia vera erit, & Pontificia, & Calviniana, quia tam constat de Carolo I. Angliæ Rege, quod strumas sanarit per contactum Regiæ manûs, & pronunciationem verborum; *Tangit te Rex, sanat te Christus*; quàm constat de Henrico IV. Galliæ Rege, id ipsum eum præstitisse; undè tamen argumentum pro veritate Ecclesiæ suæ probandâ Becanus textit. Et tantum de maiore, devolvimur ad minorem, quam ad Calendas Græcas probabit Forer; quid enim de Papæis Miraculis iudicandum, superius monuimus, quare actus labor huc non redit. Alterum verò argumentum, nempe dilemma, quod concernit, & ad prius, hoc maximè esse in quæstione, an quævis miracula sint divinitus orta? Ad posterius verò & DEUM utique veræ religioni & fidei miracula olim tanquam signacula & tesseræ affixisse, sed pro libertate, & statu tum plantandæ fidei, non autem ut miracula indivisibiliter religionem comitarentur, quia nec Christus ubique miracula edidit, nec continuari ad finem usque voluit, ventos ergò ferit dilemma, non nos; tantum enim abest miracula pro
nunc

nunc indigitare veram Ecclesiam, ut potiùs nota Anti-Christianæ sit, teste Paulò 2. Thess. 2. Quomodo autem se res habeat, dicam, brevibus: aut miracula ab oraculis divinis sunt avulsa, aut iis conjuncta; si illud, nota esse Ecclesiæ nequeunt, quia si vera sunt conjecturam solùm faciunt, non ἀποδείξιν; si falsa, fallaciam pariunt, si incerta, ambiguitatem. Si hoc, ἀποδείξιν quidem pro veritate fidei Ecclesiæque faciunt, sed κατ' ἄλλο, propter oracula, quam conjunctionem subindè urget Christus Matth. 12. ψf. 38. Luc. 16. ψf. 29. Joh. 10. ψf. 21. verbum enim est securis, miraculum quasi cuneus, à verbo ut notiori miraculis lumen affunditur, non contrà, & quemadmodum sigillum à literis avulsum nihil probat, ita quoque miracula sine doctrinâ nil valent. Claudat rivum

QUÆSTIO IV. eaque ULTIMA.

An signa petere liceat hodiernum?

IN negantem tendimus plagam, pressi sequentibus rationibus. *Primò* enim Miraculorum finem jam olim DEUS obtinuit. *Secundò*, nullò promissò ad τὸ δεῖν καὶ νῦν alligavit, utpote liberimum agens. *Tertiò*, tentatur DEUS petitione signorum, tentatur enim Numen, quoties sine Numinis verbo fiducia in aliquid concipitur, aut petitur, quod non est promissum; hinc & olim recusavit signum petere Ahas, quamvis admonitus, dicens: *Non petam signum, etenim tentabo Dominum.* Esa. 7. ψf. 12. ne dicam Satanæ eam esse indolem, nempe sine verbo signa petere Matth. 4. ψf. 3. Pharaonis Exod. 7. ψf. 9. Judæorum incredulorum Matth. 12. ψf. 38. 1. Corinth. 1. ψf. 22. Undè notanter Chrysostomus: εἰ φιλεῖς τὴν χειρὸν ὡς θεὸς φιλεῖν ἢ χρεῖαν ἔχεις σημείων, πάντα γὰρ τοῖς ἀπίστοις δίδοται. Excipies, non Satanæ solùm sed & legitimæ indolis esse signa petere. Abrahamum Patrem credentium signum petiisse Gen. 17. ψf. 9. similiter Gedeonem Jud. 6. ψf. 36. seq. nec non Hiskiam Esa. 38. ψf. 7. quorum pietas extra controversiam ἀντικείμενη fuit. Sed & in genere, petiisse equidem signa allegatos viros, sed vel fragilitate humanâ, vel in confirmationem fidei, quod olim licuit, teste Dn. D. Lucâ Osiandro, cùm per spissas tribulationum nubes vix opem tueri possent, & extraordinario pulsos instinctu: In specie verò & ad exemplum
Abra-

